

DOMINGU II TEMPU ADVENTU – TINAN C

Tema

Ita bele hatuur tema domingu ne'e nian hale'u misaun profétika. Nia mak apelu ida ba konversaun, renovasaun, katak halakon obstákulu sira hotu ne'ebé hanetik Na'i atu mai iha ita-nia mundu no ema sira nia fuan. Misaun ne'e mak ezijénsia ida halo ba sarani hotu, ne'ebé simu boun – iha tempu espesiál ida-ne'e – atu fó sasin kona-ba salvasaun/libertasaun ne'ebé Jezús Kristu lori mai.

Evanjellu apresenta mai ita João Baptista, ne'ebé konvida ita ba transformasaun totál kona-ba forma hanoín no hala'o, kona-ba valór no prioridade vida nian. Atu Jezús bele la'o hasoru ema ida-idak no apresenta ba nia proposta ida salvasaun nian, presiza atu fuan sira sai livre no disponivel atu hakohak Liafoun-Di'ak Reinu nian. Ida-ne'e mak misaun profétika ne'ebé ohin lori, Maromak kontinua entrega mai ita.

Leitura dahuluk sujere mai ita katak “dalan” konversaun nian mak loos duni ézodu ida husi rai moris-atan nian ba rai ksolok no liberdade nian. Durante perkursu, ita simu konvite atu kore ita-nia an husi kadeia sira ne'ebé impede ita atu simu proposta libertadora ne'ebé Maromak halo mai ita. *Leitura* konvida ita mós, atu moris tempu ne'e iha ksolok, hakmatek, hodi konfia iha Maromak ne'ebé la deziste atu apresenta mai ita proposta ida salvasaun nian, apezarde ita-nia salan no difikuldade sira.

Leitura daruak bolu atensaun ba faktu comunidade ne'ebé tenke preokupa an ho anúnsiu profétiku no tenke manifesta an, iha konkreto, ninia solidariedade ba sira hotu ne'ebé halo sai sira-nian knaar *Evanjellu* nian. Nia mós fó hanoín katak comunidade tenke fó sasin loos karidade nian, hodi bandu divizaun no konfliktu sira: nune'e de'it mak nia bele fó sasin kona-ba Na'i ne'ebé mai.

LEITURA I – Bar 5,1-9

“Livru Baruc” nian mak testu husi autór deskoñesidu, maski apresenta an nu'udar Baruc nia hakerek, “sekretáriu” Jeremias nian, durante ezíliu iha Babilónia (kf. Bar 1,1-2). Maski nune'e, krítika interna revela katak imposivel atribui obra ne'e ba Jeremias nia “sekretáriu (tanba haree ba dadus la la'o hamutuk ho buat ne'ebé ita hatene kona-ba Jeremias, maibé ho pós-ezíliu). Buat ne'ebé provável mak testu ne'e hakerek durante sék. II mK., iha diáspora judaika. Autór konvida makhorik sira Jerusalém nian atu selebra liturjia penitensiál ida no ezorta sira ba rekonsiliaun ho Jahwéh.

Testu ne'ebé propoin mai ita integra parte dahaat livru nian, kona-ba ezortasaun no konsolasaun ba Jerusalém – ho estilu besik liu Deutero-Isaías nian. Depoizde konvida ba konfisaun salan sira nian (kf. Bar 1,15-3,8), autór manifesta serteza katak Israel, ho roman sabedoria nian, sei filafali ba “hamta'uk Maromak” (kf. Bar 3,9-4,4). Hafoin sei simu perdaun; tanba ne'e; profeta konvida Jerusalém atu iha korajen (kf. Bar 4,5-37) no haksook ho atitude mizerikordioza Jahwéh nian, hasoru nia Povu maksalak (kf. Bar 5,1-9).

MENSAJEN

Profeta hahú hodi kompara Jerusalém infiel ba feto ida lutu nian, dezanimada no laran-susar, lahó razaun ba moris iha esperansa. Maski nune'e. Mensajen fundamentál testu nian mak:

“tempu lutu nian ne’e hotu tiha ona; Maromak perdua hotu tiha ona ó-nia salan sira no hakarak fó fila fali vida no esperansa”. Atu realizapromesa futuru foun nian, autór ko’alia kona-ba “oan desterradu sira” nia fila-hikas, hodi uza linguaken Deutero-Isaías no apresenta fila-hikas ne’e nu’udar ézodu foun husi rai moris-atan nian ba Jeruzalém foun justisa no piedade nian. Hahalok ne’e be;e mai de’it husi Maromak nia domin, ne’ebé prontu nafatin atu perdua oan rebelde sira ne’ebé hadook an husi nia no kesi fali ho sira istória ida libertasaun no salvasaun nian.

LEITURA II – Filip 1,4-6.8-11

Surat ba Filipense sira, bele dehan surat ne’ebé hatudu Paulo nia domin. Paulo dirije surat ne’e b akomunidade ida ne’ebé nia hadomi, comunidade ida ne’ebé fó tulun no preokupa ba nia.

Iha momentu nia hakerek, Paulo iha dadur (Éfeso?). Nia simu husi Filipense sira, osan no sira haruka Epafrodito, membru ida comunidade nian, ho knaar atu tulun Paulo ia buat hotu ne’ebé presiza. Bainhir aharuka hikas Epafrodito, Paulo agradese, fó not’isia, informa comunidade kona-ba ninia destinu no husu ba sira fidelidade ba Evanjellu.

Testu leitura ne’e nian halo parte “acção de graças” ih ainísiu surat nian: nia agradese Maromak ba Filipense sira nia fidelidade no empenhu atu habelar Evanjellu.

MENSAJEN

Paulo hahú hodi hatudu ninia komosaun ba Filipense sira nia empenhu iha Evanjellu nia difuzaun no iha tulun ba sira-ne’ebé hakaas an atu haklaken Liafoun-Di’ak (no ho forma espesiál ba Paulo rasik, dadur tanba ninia sasin). Paulo sente domin boot ba comunidade ida-ne’e ne’ebé iha atensaun ba evangelizadór sira-nia nesesidade, solidária ho sira hotu ne’ebé fó moris ba Evanjellu nia kauza.

Hafoin, Paulo husu Maromak atu aumenta Filipense sira-nia karidade (apezarde sai comunidade modelu, la’ós katak buat hotu perfeitu iha nivel ne’e: Paulo tenke husu señoira na’in rua atu hadame malu no keta fahe comunidade – kf. Flp 4,2-3). Moris iha karidade mak fundamentál liu atu Filipense sira bele rai an sai ema moos nafatin to’o Kristu nia mamaik.

EVANJELLU – Lc 3,1-6

Testu ohin nian tuir kedas “evanjellu infánsia nian”, iha versaun lucana. Iha-ne’e hahú, ofisialmente, Evanjellu – katak, anúnsiu Liafoun Di’ak / Boa Nova Jezús nian. Molok hahú haktuir Jezús nia asaun libertadora no salvadora iha ema sira nia leet, Lucas apresenta João Batista, profeta ne’ebé mai prepara dalan ba Maromak nia Mesias ne’ebé mai daudaun.

MENSAJEN

Lucas, hanesan ema ne’ebé “buka tiha atu hatene loloos buat hotu houri uluk kedas” (Lc 1,3), hahú hodi tau João Baptista iha kadru istóriu ida. Nia temi ema boot na’in 7 (hahú husi imperadór Tibério César, to’o amlulik boot Caifás), iha niia esforsu atu koloka tempu akontesimentu sira salvasaun nian (ita besik tinan sira 27/28). Nia sujere katak. Maromak nia aventura hodi mai hasoru ema sira atu apresenta projetu salvasaun nian no ksolok la’ós aikanoik ida, mitu ida ne’ebé inserteza sira tempu nian no iha ema sira nia memória... Maibé

istória konkreta ida, ho akontesimentu konkretu, ne'ebé bele liga ho momentu istóriu determinadu ida no rai konkreta ida.

Iha momentu daruak, Lucas apresenta João Baptista nia figura. Nia mak “lian ida hakilar iha rai-fuik maran” no ida-ne'ebé konvida atu prepara fuan sira nia daln ba Jezús, Maromak nia Mesias, atu nia bele bá hasoru ema ida-idak. Lucas hahú hodi sujere misaun profétika ne'ebé Maromak konfia ba João: nia apresenta João nia bolun ho liafuan hanesan iha Jeremias nia bolun (kf. Jer 1,1), nune'e mantein karaákte profétiku ninia anúnsiu nian. Hafoin, Lucas hatuur iha espasu jeográfiku João nia atividade profétika: nia haklaken “iha rai besik mota Jordaun” (Mateus no Marcos, tau nia iha rai-fuik maran deserto)... Ne'e rejiaun ida ho mahorik lubuk ida, liuliu bainhira Erodes no Arkelau hahú harii konstrusaun sira: anúnsiu profétiku João nan destina ba ema sira, ne'ebé simu konvite atu hakohak Mesias ne'ebé atu hatudu nia an iha mundu. Ikusmai, konkretiza iha âmbito misaun nian: João “haklaken batizmu ida konversaun nian (“baptisma metanoias”), atu kasu salan”... Liafuan “metanoias” fó hanoin revolusaun totál mentalidade nian ne'ebé lori ba transformasaun totál iha oinsá hanoin no halo... Atu simu Mesias ne'ebé atu mai, presiza prosesu ida konversaun nian ne'ebé lori atu sukat fali moris, prioridade no valór sira: iha ema nia fuan ne'ebé nakfilak duni mak Mesias sei hetan fatin.

Evanjellu taka ho sitasaun ida foti husi Deutero-Isaías (kf. Is 40,3-5), iha-ne'ebé serve atu haklaken ba desterradu sira iha Babilónia libertasaun hodi fila fali ba uma, ézodu foun. Halo nune'e, Lucas hateten katak libertasaun atu to'o daudaun: maski nune'e, presiza atu halo dalan ida konversaun nian, husik atu nakfilak an no simu “Maromak nia maksoin”.